



ISLAMSKA ZAJEDNICA U BOSNI I HERCEGOVINI

Medžlis Islamske zajednice Tešanj

Izvršni odbor

GODINA XIV
Broj: 1/50

BILTEN

Januar-mart 2018.g.
rebiulahir-redžeb 1439.h.g.

Interno informativno glasilo Medžlisa IZ-e Tešanj

**TEMA BROJA: Nastavak projekta „Dodatnog institucionalnog odgoja i edukacije“
(novi projekti i rad koordinatora) str. 4. i 5.**



Oraš Planje – 05.01.2018. Tribina i uručenje 79 vakufnama vakifima za izgradnju Plave džamije.
Vakufname uručio hafiz dr. Senaid Zaimović.



Održano 2. takmičenje „HIFZ-TEŠANJ 2018“.
Kvalifikaciono takmičenje održano 10.03.2018.
Finalno takmičenje održano – 17.03.2018.g.

**Održana 5. sjednica skupštine
Medžlisa IZ-e Tešanj u V sazivu - 25.02.2018.**

**Hafiska dova hafiza mr. Vedada Jupića
Šije, 04.03.2018. – str. 8.**



Na kojoj je usvojen Izvještaj o radu IO Medžlisa IZ-e Tešanj za 2017. g. sa Općim smjernicama za rad u 2018. i data saglasnost na Završni račun za 2017. godinu i Budžet za 2018. g., te uručene pohvale zaslužnim.



Diplomu hafizu uručio izaslanik Reisu-l-uleme muftija zenički doc. dr. Ejub ef. Dautović.



Hafiz Vedad sa majkom Fatimom

NAJAVLJUJEMO

14.04. 2018. – Trepče – Tradicionalni mevlud za šehide i Dan MZ – u džamiji Trepče poslije podne-namaza

30. 04. 2018. - Mrkotić-Putešić - Tradicionalni Mevlud za šehide u džamiji, poslije akšam-namaza.

03. 05. 2018. - Medakovo - Mevlud u povodu općinskog Dana šehida, poslije akšam-namaza.

06. 05. 2018. - Miljanovci Novi - Tradicionalna „Večer Kur'ana“ u džamiji, poslije akšam-namaza.

13. 05. 2018. - Lepenica – tradicionalni mevlud u mesdžidu Bedaci, poslije podne-namaza.

14. 05. 2018. - Jelah – večer ilahija – „U susret ramazanu“, poslije akšam-namaza.

Srijeda, 16. 05. 2018.– 01. 09. 1439. h. g. – Prvi dan ramazana - prvi dan posta.

RIJEČ UREDNIKA**Iz obraćanja na sjednici Skupštine Medžlisa**

Ono što je vidljivo iz punuđenog izvještaja jeste da je Medžlis Tešanj napravio značajne pomake u svom radu u godini iza nas.

Zbog toga moje obraćanje ovom časnom skupu ima za cilj da nas podsjeti na godinu koja je iza nas i na godinu koja je ispred nas. Radni materijali koji su pred vama predstavljaju realizaciju smjernica usvojenih na prošlogodišnjoj skupštini i izraz naših želja i mogućnosti da organizujemo islamsku zajednicu koja će biti istinski predstavnik Islama i muslimama i koja će biti radost i ponos našem narodu. Zato danas možemo biti ponosni i radosni.

Ponosni na 2017 god. kao i na mandat 2014-2018 u kome su vam muslimani Tešnja povjerali emanet da ih zastupate u Skupštini medžlisa. Budite ponosni jer ćete biti upamćeni kao generacija koja je pored redovnih aktivnosti, a koje su mjerljive unutar Rijasetu Islamske zajednice u BiH, sačuvali, afirmisali i proširili vakuf Gazi Ferhad bega kroz ovaj prelijepi atrij nekadašnje tešanjске medrese u kome se spajaju istok i zapad i iz kojeg se šalje stvarna slika Islama.

Radosni smo što smo u godinu iza nas unutar medžlisa osnovali i otvorili kutak za našu djecu u Kutahiji džamiji i nazvali ga Revdom (džennetskom baščom) u kome 40 djece predškolskog uzrasta uče prve korake u svom životu o islamskim vrijednostima u vrijednostima zajedničkog života na ovom prolaznom svijetu, odnosno o vrijednostima džemata. Na ovaj način šalje nam se poruka da džamija treba da ima centralno mjesto u našem životu i da svako od nas treba u svom životu da pređe džamijski prag prije nego što bude donesen pred džamijski prag. Revda je prva predškolska ustanova na području zeničkog muftiluka, a među prvim na području Rijasetu osnovana od strane Islamske zajednice.

Tužni smo zbog socijalnog, zdrastvenog i općeg ambijenta ummeta u kome je po raznim osnovama veliki broj potrebiti ali smo zahvalni Dragom Bogu što nam je omogućio da se odazovemo u granicama naših mogućnosti onima koji su potrebni. U godini iza nas to iznosi preko 300.000,00 KM, što znači da je svaki član islamske zajednice pored članarine dao u hajr prosječno 20,00 KM. Tužni smo što smo bili sudionici rušenja minareta Čarši džamije zbog olujnog vetra 12. decembra 2017. god., sa kojeg su od 1558. godine mnoge generacije slušale poziv na namaz i spas. Na nama je da u što kraćem roku vratimo sjaj Čarši džamiji izgradnjom minareta. Ovo je prilika da se posebno zahvalim zeničkom muftiji doc.dr. Ejubu Dautoviću koji je taj dan bio sa nama i koji je interventno uplatio sredstva za Čarši džamiju. Takođe želim da se zahvalim općinskom načelniku i premijeru ZDK koji su prilikom posjete Medžlisu obećali sanaciju krova na džamiji kao i mnogim drugim koji su bili u tim trenucima tu kao što je građevinska firma Inter sa svojim radnicima kao i civilna zaštita općine Tešanj.

Aktivnosti IO Medžlisa IZ-e :

Održana 27. redovna sjednica IO 16. 02. 2018. u prostorijama Medžlisa IZ-e Tešanj kojom je predsjedavao predsjednik Zehrudin Kruško, a prisustvovalo 12. članova. Na sjednici je razmatran dnevni rad od 10. tačaka i usvojeni: Zapisnik i informacija o realizaciji zaključaka sa 26. redovne sjednice, prijedlog Izvještaja o radu IO za 2017. godinu sa općim smjernicama za rad u 2018. godini koji će biti upućen Skupštini Medžlisa na usvajanje, prijedlog Završnog računa za 2017. godinu i Budžeta za 2018. godinu koji će biti upućeni Skupštini Medžlisa na saglasnost, a potom Rijasetu na konačno usvajanje, Odluka o dodjeli pohvala zaslužnim za 2017. koje će biti uručene na sjednici Skupštine, prijedlozi Komisije za vakuf i vakufsko zemljište o uvakufljenjima zemljišta od vakifa: Danović Jasmin, Muminović Mustafa i Ferida, Smajić Muhamed i dr., prijedlozi džematskih odbora Bobare i Miljanovci Novi za izmjenu naziva džemata – Bobare u Bobare-Drinčići, a Miljanovci Novi u Novi Miljanovci, koji će biti upućeni Rijasetu IZ-e u BiH na registraciju i potvrđivanje i dr.



05.03.2018- Telefonska (28.) sjednica IO – prihvaćen sporazumni prekid radnog odnosa sa Sadulah ef. Salkanovićem i usvojena Odluka o premještanju Adem ef. Garića iz Medakova u džemat Piljužići.

27. 03. 2018. g. Održana 29. redovna sjednica u prostorijama Medžlisa IZ-e Tešanj. Sjednicom je predsjedavao predsjednik Zehrudin Kruško, a prisustvovalo 13 članova. Razmatran je dnevni red od 9 tačaka, a usvojeni su: Izvod iz zapisnika sa 27. redovne i 28. telefonske sjednice, informacija o održanoj 5. sjednici Skupštine Medžlisa IZ-e Tešanj, Plan aktivnosti za takmičenje učenika osnovnih i srednjih škola iz vjeronauke, Plan aktivnosti za takmičenje i završne ispite polaznika mektepske nastave, Prijedlozi komisije za vakuf i vakufsko zemljište, Odluka o zatvaranju investicije i razrješenju GO Hamzibegove džamije, i dr.

POZIV NA SARADNJU

Esselamu alejkum, poštovani čitatelji!

Pred vama je novi broj Biltena Medžlisa IZ-e Tešanj. Ovo je još jedan naš pokušaj da damo skroman doprinos u prezentaciji našeg rada i aktivnosti i da ga približimo vama.

Javite nam se sa vašim primjedbama i sugestijama kako bismo zajednički što bolje prezentovali naš Medžlis.

Posjetite našu web stranicu i dostavite vaše ideje na naš e-mail

naša web stranica: www.miztesanj.ba

javite nam se na novi e-mail: info@miztesanj.ba

Bilten Medžlisa IZ-e Tešanj

Izdavač: Medžlis IZ-e Tešanj, za izdavača predsjednik IO Zehrudin Kruško.

Glavni i odgovorni urednik: mr. Fuad ef. Omerbašić, tekst i foto Rašid Orlović.

Redakcija: Dževad ef. Hasanbašić, mr. Enver ef. Kurtić, hafiz mr. Almir ef. Hadžić i Suljo ef. Djedović prof. Saradnici imami MIZ-e Tešanj.

U projektu Muftijstva zeničkog „Izbor najbolje hutbe“ za januar i februar 2018. odabrana je „Hutba o vremenu“ hafiza mr. Almir ef. Hadžića, imama iz džemata Jelah.

Hutba o vremenu

Zahvala pripada Allahu dž. š. i neka je salavat i selam na našeg Poslanika Muhammeda a.s., na njegovu časnu porodicu i plemenite ashabe. Poštovana braćo!

Vrijeme je Allahov dar i Allahova blagodat, kao i ljudski život, zdravlje, mladost i mnoge druge blagotati koje nikada nismo u stanju nabrojiti kada bismo ih danočno evidentirali i nabrajali.

Kur'an i sunnet poklanjaju vidnu pažnju bitnosti vremena, tako da se u brojnim surama Allah dž.š. kune vremenom ili nekim dijelovima vremena, poput noći, dana, fedžra – jutra, duha – perioda nakon izlaska sunca, asra – ikindije.

U suri El-'Asr Allah dž.š. ističe da u ovom ograničenom životu imamo veoma važne zadatke koje trebamo prema svojim sposobnostima i mogućnostima ostvariti, te kaže: „Tako mi vremena, čovjek, doista gubi, samo ne oni koji vjeruju i dobra djela čine, i koji jedni drugima istinu preporučuju i koji jedni drugima preporučuju strpljenje.“

U hadisu kojeg prenosi Muaz b. Džebel r.a., od Allahovog Poslanika a.s. također se ukazuje na bitnost vremena, te se kaže: „Neće se stope jednog čovjeka pomjeriti na Sudnjem danu sve dok ne bude pitan za četvero: za život, u šta ga je potrošio, za mladost, u šta ju je proveo, za imetak, kako ga je stekao i u šta ga je utrošio, i za svoje znanje – da li je postupao po njemu!“ (Tirmizi, hadis je hasen)

Navedeni hadis nas na slikovit način uči kako da osmislimo svoj život. Čovjek nije vlasnik svog života i prema njemu ne bi smio biti nemaran i neodgovoran. Ovaj život na ovom svijetu je središnja faza našeg bitisanja na kome se spremamo za vječnost. Neki od samog početka spoznaju bit života i provode ga u smislenom, moralnom i pokornom životu potčinjenom Allahu dž.š. Dok ogromna većina ni nakon doživljavanja pozne starosti ne dokuče nažalost ovo značenje života. Mnogi se prepuštaju dokolici, besciljnom tumananju i udovoljavanju čulnim strastima gubeći tako dragocjeno vrijeme i srozavajući ga na razinu animalnog. Od smrti niko nije izuzet, a vrijeme neumoljivo prolazi. Prošli dani se ne mogu povratiti, oni su daleko iza nas. Zahvalnost na blagodatima vremenu se izkazuje sa trošenjem vremena u činjenju dobrih djela i u vječnim hajratima. Poslanik s.a.v.s., kaže: „Dvije su blagodati prevarile mnoge ljude – zdravlje i slobodno vrijeme!“ (Buhari)

Obaveze nije dozvoljeno odgađati za neko buduće vrijeme u smislu kada ostarim ili budem imao više vremena klanjat ću, postiti, obaviti hadž itd. Ko nam može garantirati da ćemo ostariti ili da nas smrt neće preteći. Arapski pjesnik kaže: „Naoružaj se pobožnošću, jer ne znaš noć kad padne hoćeš li zoru dočekati.“

Koliko je samo zdravih umrlo, a bolesnih se naživjelo. Svako od nas je dužan požuriti sa činjenjem dobrih djela i ispunjavanju svojih obaveza i dužnosti. Allah dž. š. kaže: „Zato se natječite ko će više dobra učiniti.“(El-Maide 48.)

Požurite se i natječite poput takmičara koji hitaju prema cilju i svaki od njih se bori da bude prvi. Alimi iz prijašnjih generacija su imali običaj kazati da su većina ljudi 'musevifuni' tj. oni koji govore 'sefve', uradit ću, učinit ću pokajanje, popraviti ću se, početi ću klanjat od sutra ili slijedeće godine, otići ću na hadž kada ostarim i još malo poživim. Žene govore pokrit ću se kasnije jer je još rano i tome sl. Zar nam je Uzvišeni Allah dao potvrdu na kojoj piše dokle ćemo živjeti i kada ćemo umrijeti. Niko od nas ne zna šta ga čeka u budućnosti. Čovjek često nije svjestan ovih blagodati kao što su mladost, zdravlje, slobodno vrijeme dok ih ne izgubi.

Zdravlje je Allahova blagodat koju moramo iskoristiti u pokornosti Allahu dž. š., a ne u haramu. Slobodno vrijeme smo dužni iskoristiti u izvršavanju svojih obaveza prema sebi i drugima, u školovanju, obrazovanju, radu itd. Jer ako mi ne iskoristimo slobodno vrijeme i ne ispunimo ga korisnim sadržajima, šejtan će ga ispuniti onim što njemu odgovara i ponuditi nam zabludu umjesto istine, štetno umjesto korisnog. Obećajmo sebi da ćemo izvršavati svaki namaz u džamiji na najpotpuniji način i da ćemo koristiti blagodat zdravlja samo u onome što Allaha dž. š. čini zadovoljnim.

O prolaznosti i nepovratnosti vremena govorio je Hasan el-Basri riječima: „Nema dana koji Ademovom sinu prođe a da ne kaže: 'O sine Ademov, ja sam tvoj novi dan i svjedok sam tvom djelu. Kad odem od tebe, neću ti se više nikada vratiti. Radi šta hoćeš – naći ćeš ti pred sobom, i odgađaj šta hoćeš – neće ti se vratiti!“

Treba znati da ćemo za sve blagodati polagati račun pred Uzvišenim Allahom. Svaki život pred koji nije jasno postavljen cilj je promašen. Da bi se ostvarili životni ciljevi treba dobro osmisliti svoje vrijeme. O tome kako provode svoje vrijeme posebno mladi moraju voditi računa. To je najproduktivnije razdoblje života. Tada se najviše uči, formira odnos prema životu i svijetu, formira porodica i osigurava egzistencija. To je vrijeme ispitivanja i provjeravanja svih mogućih životnih vrijednosti. Nažalost, naša omladina ne cijeni dovoljno vrijeme. Nema jasan cilj u životu. Mnogi su noć pretvorili u dan, a dan u noć. Ovo što se danas dešava u muslimanskom svijetu je gubljenje i traćenje vremena. Kuća ummeta je u dubokom snu, a vrata su otvorena. Ako nam vjera i znanost ne budu opsesija, naš progres će biti još stotinama godina daleko. Mladi ljudi su u prošlosti kada je islamska civilizacija bila na vrhuncu svoje moći bili nosioci napretka. To nisu postigli besposličarenjem nego samoodricanjem i upornim radom. Navedimo primjer Usame ibn Zejda koji je u 17. godini bio zapovjednik ogromne muslimanske vojske. Imamo i primjer Mehmeda el-Fatiha koji je u 23. godini života osvojio Konstantinopolis, odnosno današnji Istanbul.

Ako u životu ne možemo sve postići, ne trebamo sve ostaviti i napustiti. Cilj će postići samo oni koji svoje vrijeme pravilno rasporede. Neka nam kao primjer posluže ovi veliki i plemeniti ljudi, a prije svega Allahovi Poslanici. Prohujale godine i prohujali dani nikada se više neće vratiti. Oni pripadaju prošlosti. Kada bi to samo mladi ljudi znali!

Sahr El-Gamidi, r. a., pripovijeda da je Allahov Poslanik, s.a.v.s., rekao: „Allahu moj, daj mom ummetu beričet u ranim satima.“(Ebu Davud, 2606.) Za krizu i tjeskobu u vremenu koju, manje više svi osjećamo dobro će nam poslužiti ovaj hadis koji u sebi nosi jednu veliku korist, koje nismo ni svjesni a to je ova Pejgamberova s.a.v.s., dova za beričet i blagoslov u *nafaki* i svemu drugom, u jutarnjim satima dana.

Pokušajmo zamisliti da naš život čini samo dan u kojem se nalazimo, tj, kao da si danas rođen i da ćeš danas umrijeti. Svoj trud, ambicije i težnje posveti današnjem danu prema ibadetu. Reci sebi: „Danas ću sve namaze skrušeno obaviti, obavljati ću i nafile, učiti ću Kur'an, spominjati ću Allaha dž. š. iz srca i smjerno ću se odnositi prema svome Gospodaru. Ako tako postupiš postići ćeš sreću i smirenost i time ćeš na najbolji mogući način iskazati zahvalnost Uzvišenom Allahu na blagodatima vremena. Uzvišeni Gospodaru podari nam beričet u vremenu i da budemo Tvoji zahvalni robovi. Amin!“

TEMA BROJA

NASTAVAK PROJEKTA „DODATNOG INSTITUCIONALNOG ODGOJA I EDUKACIJE“

U cilju promoviranja potrebe cjeloživotnog institucionalnog odgoja i edukacije Medžlis IZ-e Tešanj je i u periodu januar – mart 2018. nastavio projekat „Dodatnog institucionalnog odgoja i edukacije“, izdajamo:

1. Stručni seminari za imame

Stručne seminare imama u ovom periodu organizirali su Medžlis IZ-e Tešanj i Muftijstvo zeničko i to:

1. stručni seminar - 23. 01. 2018. za imame medžlisa IZ-e Tešanj, Teslić i Doboj održan u atriju MIZ-e Tešanj na temu „Primjenjivanje, prakticanje i objašnjavanje Kur'ana danas“ koju je prezentirao Zijad ef. Ljevaković prof. Seminar je održan u organizaciji Muftijstva zeničkog u prisustvu muftije.



3. stručni seminar – 13.02.2018. održan u velikoj sali Medžlisa IZ-e Tešanj na kome je temu: „Imamski poziv kroz prizmu rada Abdulah ef. Ganića“ predstavio glavni imam Medžlisa IZ-e Sarajevo dr. Ferid ef. Dautović, a prisutnim imamima se obratio i Muftija zenički.



2. stručni seminar – 30.01.2018. održan u velikoj sali Medžlisa IZ-e Tešanj na kome je temu: „Abdest“, prezentirao mr. Enver ef. Kurtić imam džemata Čarši džamije u Tešnju.



4. stručni seminar – 06.03.2018. za sve imame muftiluka zeničkog održan u Ensar džamiji Zenica. Promocija publikacije: „Analiza ideologije tekfira i nasilnog ekstremizma“.



5. stručni seminar – 13.03.2018. održan u velikoj sali Medžlisa IZ-e Tešanj na kome je temu: „Sastavni dijelovi namaza,“ održao Mersed ef. Hasanović prof. imam džemata Kalošević.



Radni sastanak – uporedo sa održavanjem stručnih seminara redovno se (svakih 15 dana) održavaju radni sastanci sa imamima (utorkom) – radi sastanak 27.03.2018.



2. Saradnja sa nevladinim sektorom – NVO (koordinator Rašid Orlović)

2.1. Održno drugo takmičenje u učenju Kur'ana napamet „HIFZ-TEŠANJ 2018“

U okviru projekta IZ-e u BiH: „Saradnja sa nevladinim sektorom“, Medžlis IZ-e Tešanj je u saradnji sa UB „Vrijeme Zeman“, a pod pokroviteljstvom Muftijstva zeničkog i finansiranje od strane porodice El-Va'lan Al-Mutairi iz Kuvajta, organizirao 2. takmičenje u učenju Kur'ana napamet „Tešanj Fifz 2018.“. Takmičenje je održano u četiri kategorije sa učešćem takmičara iz cijele BiH – ukupno prijavljeno 289 kandidata (po kategorijama 46 za 1., 76 za 2., 61 za 3. i 106 za 4. kategoriju).

Kvalifikaciono takmičenje je održano 10. 03. 2018. za sve četiri kategorije odvojeno po kategorijama u tešanjskim džamijama, a finalno 17. marta 2018. godine na jednom mjestu (Centar za kulturu Tešanj).

U 1. kategoriji – prvih 5 džuzova Kur'ana: 1. mjesto - Kalabić Velid, Zavidovići; 2. mjesto - Abdel Monem Abdelrahman – Sarajevo; 3. mjesto - Elfarahati Jusuf, Ilidža; 4. mjesto – Omeragić Usume, Novi Travnik; 5. mjesto – Ammar Muhammed, Sar.

U 2. kategoriji – sura Ali Imran: 1. mjesto – Ait Idir Abdulah, 2. mjesto – Adilović Muhamed, 3. mjesto – Sjerotanović Esma, 4. Ammar Ibrahim, 5. mjesto – Hadžić Abdurrahman i Omeović Harun.

U 3. kategoriji – džuz Tebareke (29.džuz): 1. mjesto – Beganović Merjem, 2. mjesto – Ćosić Ahmed, 3. mjesto – Pezić Zubejr, 4. mjesto – Aganhodžić Madžid, 5. mjesto – Alić Talha,

U 4. kategoriji – džuz Amme (30.džuz): 1. mjesto – Sinanović Mustafa, 2. mjesto – Čirak Muhamed, 3. mjesto – Čavak Ahsen, 4. mjesto – Vlahovljak Abdulhadi, 5. mjesto – Kovač Musa.

Pobjednicima su uručene nagrade: u 1. kategoriji: 1. mjesto-hadž, 2. i 3. mjesto – umra, 4. i 5 mjesto – po 500,00 KM;

u 2. kategoriji: 1. mjesto - umra, 2. mjesto – laptop Lenovo, 3. 4. i 5. mjesto po 500,00 KM (dva takmičara 5. mjesto);

u 3. kategoriji: 1. mjesto - Laptop Dell, 2 i 3. mjesto – po 500,00 KM, 4 i 5. mjesto – po 400,00 KM

u 4. kategoriji: 1. mjesto–500,00 KM, 2. mjesto–400,00 KM, 3. mjesto–300,00 KM, 4. mjesto–200,00 KM i 5. mjesto–100,00 KM.

2.2. - Kurs Islama „Biti dobar čovjek“ za odrasle počeo 03.02.2018. u Šarenom mektebu koji organizuju Medžlis IZ-e Tešanj i Udruženje Bošnjaka „Vrijeme-Zeman“ i to iz 5 oblasti. Akaid – predavač Jasmin Hadžikadunić, Kur'an i tefsir – predavač hafiz mr. Nermin ef. Ibrahimović, Hadis – predavači mr. Fuad ef. Omerbašić i mr. Enver ef. Kurtić, Sira – hafiz Ahmed ef. Bukvić prof., i Islamski odgoj (etika) – predavač Esmir Bašić, pedagog. Prijavljeno 38 polaznika.



3. Programi za žene: (koordinator Fatima Ćeman)

3.1. Održana modna revija za pokrivene, 03.02.2018. u okviru obilježavanja 1. februara Svjetskog dana hidžaba.



2. Održana promocija knjige „Majka“ –10.03.2018., pjesnikinje Fikrete Karić. Pored autorice, promotori su bile: Enesa Piro Bedaković, prof. i Fatima Ćeman koordinatorica.



2.3. Miljanovci Novi, zajednički mevlud i hatma dova za šehide u zajedničkoj organizaciji: džemata i MZ Miljanovci Novi i Miljanovci i Udruženja „Oreda TO/2. Bataljon Miljanovci 207/377 Vbbr. Pousorska-Ljuta“ u džamiji džemata Miljanovci Novi poslije jacie-namaza. Mevlud su proučili imami MIZ-e Tešanj, a prisutnima se obratili imam Bersad ef. Kozlić prof., Damir ef. Peštalić, glavni imam MIZ-e Srebrenica i glavni imam mr. Fuad ef. Omerbašić.

2.3. Medžlis – 18.03. 2018. Obilježeni: 21. mart međunarodni Dan šuma i 22. mart Dan voda – u saradnji sa udruženjem „Eko Mladi“. Zapažen seminar na temu Ekologija polaznicima kursa islama u velikoj sali Medžlisa IZ-e Tešanj održao dipl. ing. Adnan Lihić.

2.4. – Medžlis – Zaključen sporazum sa udruženjem pčelara „Pčela“ Tešanj o ustupanju prostora i organizaciji seminara dva puta mjesečno u periodu mart – august 2018. g.

4. Mreža mladih: (koordinator Ramo ef. Svrzo)

4.1. Posjeta mreže mladih iz Sarajeva i Kaknja, 03. 03.2018. koordinatori Mreže mladih Stari Grad - Sarajevo, Centar - Sarajevo i Kakanj posjetili kolege iz Mreže mladih u Tešnju u atriju Medžlisa IZ-e Tešanj, pored kolega iz mreže mladih, domaćini su im bili glavni imam i Ramo ef. Svrzo, koordinator Mreže mladih MIZ-e Tešanj.



4. 2. Sedmično druženje srijedom – koordinatori tešanjске mreže mladih svake srijede neveče organizuju druženje mladih u atriju Medžlisa IZ-e Tešanj i pozivaju omladinu na druženje.

5. Tribine, promocije, predavanja, halke Sufare i Kur'ana...

Mrkotić-Putešić – Halka učenja Sufare i Kur'ana i uručenje Filips TV – U novoj mektepskoj učionici održava se halka učenja Sufare i Kur'ana i cilju završetka hatme šehidima do tradicionalnog mevluda 30.04.2018. Ovu halku pojetio je dr. Faruk Unkić i uvakufio Filipsov TV 55 inča za ovu učionicu.



5.2. Miljanovci Novi, 06.01.2018. Glavni imam uručio 15 svjedodžbi o završenoj hatmi odraslim polaznicima halke učenja Kur'ana i to: Smajić Hanka, Ismaili Emina, Klepić Fikreta, Husibegović Mirsada, Hadžan Fatima, Okić Nedžada, Smajić Zuhra, Kruško Jasmina, Mujkanović Almira, Kruško Emira, Pazara Mirnesa, Brković Mersida, Jacić Merisa, Okić Ćamila i Hodžić Mirnesa.



5.3. Mračaj-Potočani, 04.02.201.g. Tribina, gost Dževad ef. Kurtalić, prof.

5.4. Dobropolje-Mekiš- mjesečne tribine:

- 27.01.2018. tema „Stanovništvo Bose do kraja 16. stoljeća“ gost dr. Bilal Memišević.
- 03.03.2018. tema „Islamska tradicija Bošnjaka i savremeni društveni procesi“ gost dr. Abdulgafar Velić.
- 24.03.2018. tema „Imamo li bereketa“ gost hafiz Ammar ef. Bašić.

5.5. – Čarši džamija – 22.03.2018. – Obilježena mubarek noć Lejletu-l-regaib poslije akšam-namaza za područje grada uz učešće gradskih imama i obraćanje glavnog imama.

5.5. Sedmične tribine u gradu, u periodu do 31.03.2018. godine održavane u: Čarši-džamiji nedjeljom – iz Hadisa. Harman džamiji – srijedom – iz Povijesti islama. Dibekhana džamiji – četvrtkom – Tefsir Kur'ana. Hamzibegovoj džamiji – iz Ahlaka i Akaida. Kao i druge aktivnosti (halke učenja Sufare i Kur'ana....).

Održana 5. redovna sjednica Skupštine Medžlisa IZ-e Tešanj

Održana 5. redovna sjednica Skupštine Medžlisa IZ-e Tešanj (u V sazivu) – 25. 02. 2018. u atriju Medžlisa IZ-e Tešanj sa početkom u 9,00 sati kojoj su prisustvovala 54 zastupnika (od 86 izabranih), muftija zenički doc. dr. Ejub ef. Dautović, sabornik i Općinski načelnik mr. Suad Huskić i glavni imami medžlisa sa područja muftijstva. Sjednicu je sazvao i istu otvorio predsjednik IO Zehrudin Kruško, nakon čega je, izabrano radno predsjedništvo u sastavu: Semir Sejdinović predsjedavajući, Mustafa ef. Balić član i Kasim Halilović, zapisničar.



Radno predsjedništvo i predsjednik IO

Na početku rada sjednice prisutnima se obratio predsjednik IO Zehrudin Kruško i obrazložio Izvještaj o radu IO za 2017. godinu, Opće smjernice za rad IO za 2018. godinu, Završni račun Medžlisa za 2017. godinu, te prijedlog Budžeta za 2018.



Nakon čega se prisutnima obratio i glavni imam Medžlisa IZ-e Tešanj mr. Fuad ef. Omerbašić.



Na sjednici je bez primjedbi usvojen:

- Izvještaj o radu IO za 2017. sa Općim smjernicama za rad u 2018. godini, te data saglasnost na:
- Završni račun Medžlisa za 2017. i Budžet za 2018. godinu.

U svojstvu gosta prisutnima su se obratili i čestitali na Izvještaju i ostvarenim rezultatima Džafer ef. Gračić, glavni imam Medžlisa IZ-e Žepče, i mr. Suad Huskić, sabornik i Općinski načelnik.

U toku rada sjednice prisutnima se obratio i muftija zenički doc. dr. Ejub ef. Dautović.



U svečanom dijelu sjednice dodjeljene su pohvale IO za postignuti uspjeh u radu za 2017. godinu:



Hfz. mr. Nermin ef. Ibrahimoviću, imamu Dibekhana dž.



Feridu Lihću, predsjedniku dž.o. Jablanica



Selimu Kruški, blagajniku džemata Miljanovci Novi

Priznanje Muftijstva zeničkog za doprinos u radu Skupštine



Semiru Sejdinoviću, iz džemata Šije Donje Polje



*i Mustafi ef. Baliću, iz džemata Tešanjka
Posebne Zahvale za doprinos u radu i afirmaciji Medžlisa u mandatnom periodu 2014-2018. uručene su muftiji i saborniku*



Događaji, iz naših džemata...

Tešanj; 27.02.2018.g. Održana izvještajna sjednica OO Ilmije Tešanj, pod predsjedavanjem radnog predsjedništva: Suljo ef. Djedović prof., predsjednik, Mustafa ef. Balić prof., sekretar i Dževad ef. Hasanbašić blagajnik.



Na sjednici je usvojen Izvještaj o radu za 2017. godinu i završeni račun za 2017. godinu.

U svečanom dijelu sjednice uručene su hedije najzaslužnijim distributerima štampe:

Raif ef. Hasak prof, imam džemata Mijanovci; Bersad ef. Kozlić prof., imam džemata Miljanovci Novi; Elvedin ef. Aličić prof., imam džemata Lepenica, mr. Enver ef. Kurtić, imam džemata Čarši-džamije i Muris ef. Mahalbašić prof., imam džemata Oraš Planje.

Za jubilarne godine rada uručene su hedije: za 20 godina: Emir ef. Hodžiću, imamu džemata Trepče; Hajrudin ef. Deliću, imamu džemata Mrkotić-Putešić i Džafer ef. Alispahiću, imamu džemata Dolac-Kotlanice; za 30 godina: glavnom imamu mr. Fuad ef. Omerbašiću; Ševal ef. Deliću, imamu džemata Šije (odsutan-na sjednici u Zenici) i hadži Rašidu Orloviću, sekretaru, te predsjedniku IO Medžlisa IZ-e Tešanj Zehrudin Kruški za osmogodišnju uspješnu saradnju i Sadullah ef. Salkanoviću imamu džemata Piljužići u znak sjećanja na rad u Medžlisu IZ-e Tešanj.

Na sjednici su uručene i prigodne novčane hedije penzionisanim imamima i udovima imama od Ilmije i Medžlisa IZ-e Tešanj.

Sve prisutne je poselamio i počastio Samedin ef. Bajrić prof., bivši imam džemata Šije Gornje Polje koji je od prošle godine imam u džematu San Jose u Kaliforniji (USA), a Haris ef. Zahirović informisao prisutne o posjeti Turskoj (zajedno sa Raif ef. Hasakom) u okviru posjete imama iz BiH u organizaciji Glavnog odbora Ilmije.

Hedije za 20 godina rada:



Emir ef.



Hajrudin ef.



Džafer ef.

Hedije za 30 godina rada i



Glavnom imamu



Sekretaru



Sadullah ef.

za ispraćaj

Medžlis – 23.02.2018. Održana promocija knjige „Kako do zdravlja usta i zuba naše djece“ i slikovnice „Boli – ne boli zub“ prim. dr. hadži Samira H. Hundura, specijaliste pedodonta u prepunom atriju Medžlisa IZ-e Tešanj. Promotori: dr. Esad Hasnićević i autor, moderatog glavni imam.



Medžlis – 16.03.2018. Održana promocija knjige „Hadž iz Bosne za vrijeme osmanske vladavine“, u okviru općinske manifestacije „Tešanjsko proljeće“. Promotori: dr. Muamer Hodžić i autor Aladin Husić, moderator glavni imam.



Medžlis – 28.03.2018. Predstavljen prevod Kur'ana Nurke Karamana u atriju Medžlisa. Promotori: Zijad Ljevaković, Hadžem Hajdarević, Nurko Karaman i Mustafa Bećirović, moderator glavni imam.



Harman džamija – 27.03.2018. Završena rekonstrukcija munare.



Šije – Proučena hafiska dova i u hafiza Kur'ana Časnog promoviran hafiz mr. Vedad Jupić

U nedjelju, 4. marta 2018. poslije podne-namaza u džamiji džemata Šije, proučena je hafiska dova i u hafiza Kur'ana Časnog promoviran mladi hafiz mr. Vedad Jupić, profesor matematike u Gazi Husrev-begovoj medresi u Sarajevu.

Hafisku dovu proučio je njegov muhafiz hafiz mr. Salih ef. Halilović, a diplomu hafiza Kur'ana Časnog uručio muftija zenički doc. dr. Ejub ef. Dautović, izaslanik reisu-l-uleme IZ-e u Bosni i Hercegovini.

Ovoj svečanosti, pored muftije prisustvovali su: glavni imam Medžlisa IZ-e Tešanj mr. Fuad ef. Omerbašić, direktor Gazi Hesre-begove medrse hafiz mr. Mensur ef. Malkić, hafizi: Salih Halilović (muhafiz), Maid Ibrahimović, Alija Rahman, Nedžad Čeman, Zaim Šiljić, Nermin Ibrahimović, Ahmed Bukvić, Almir Hadžić, Almir Salkanović i Hamdo Solo, profesori GHM Halim Husić, Abdulgafar Jukić, Edin Balta, Dževad Hećo, Merzuk Đulan i Salih Hušić, imami Medžlisa IZ-e Tešanj i Doboj, predsjednik IO Medžlisa IZ-e Tešanj Zehrudin Kruško sa saradnicima, Općinski načelnik mr. Suad Huskić, te brojne džematlije, rodbina i prijatelji hafiza Vedada.

Vedad Jupić je 19. poslijeratni tešanjki hafiz, sin je šehida Bajrama i majke Fadile, rođen 26. 09. 1992. godine u Tešnju. Mektebsku nastavu je pohađao u džematu Šije kod Ševal ef. Delića. Nakon završetka O.Š. „Mustafa Mulić“ u Šijama upisuje Gazi Husrev-begovu medresu u Sarajevu koju završava 2011. godine. Po završetku medrese upisuje Prirodno- matematički fakultet u Sarajevu, odsjek matematika i FIN, odsjek za imame i hatibe. Zvanje magistra matematike stiče 2016. godine. Hifz je položio pred komisijom za hifz Rijasetu IZ u BiH 13.01.2018.godine. Trenutno zaposlen kao profesor matematike u Gazi Husrev-begovoj medresi u Sarajevu.



Hafiz Vedad uči kratke sure



Muhafiz uči dovu




hafiz sa zvanicama

Socijalno-humanitarne aktivnosti (koordinator Ševal ef. Delić)

1. Šije–09.03.2018.g. Muftija zenički doc. dr. Ejub ef. Dautović uručio priznanje Ševal ef. Deliću i džematskom odboru Šije za doprinos u afirmaciji i razvoju džemata Šije, posebno za humanitarne aktivnosti koje je realizirao ovaj džemat. (Izgradio 6 kuća za socijalno-ugrožene džematlije, u saradnji sa džematima Šije Donje Polje i Šije Gornje Polje, Mjesnom zajednicom, UG "Ponikva" i privrednicima džemata Šije, realizirano 15 akcija prikupljanja pomoći za liječenje).



2. Medžlis, - postavljena sergija za liječenje Poprzanović Nejre –prikupljeno 12.517,50 KM i uručeno ocu 12.02.2018.



3. Medžlis – 09.02.2018. Postavljena sergija za obnovu džamija u Mostaru i sredstva uplaćena na račun Rijasetu.

4. Medžlis–09.03.2018. Postavljena sergija za pomoć džematima u kojima je počinjen genocid, prikupljena sredstva uplaćena na račun Rijasetu.

5. Pomoć penzionisanim imamima i udovima imama isplaćena 27.02.2018.

6. Pomoć Udruženju slijepih građana Tešanj u organizaciji 15. međunarodnog turnira u Golbalu.

Posjetili su nas

Delegacija Medžlisa IZ-e Zenica – 13.02.2018. predvođena glavnim imamom mr. Jakub ef. Salkicom. Razgovor o rekonstrukciji objekta sjedišta Medžlisa IZ-e Zenica po uzoru na Medžlis IZ-e Tešanj.



Delegacija Medžlisa IZ-e Prnjavor – 19.03.2018. predvođena glavnim imamom Fikret ef. Čelenkom prof. Uručili zahvalnicu za pomoć MIZ-e Prnjavor u vrijeme povratka, i novčana sredstva za restauraciju Čarši-džamiji i munare u Tešnju.

